

Inatsisartut isummerfigisassaattut siunnersuut, Naalakkersuisut peqquneqassasut nalunaarusiussasut, meeqqat atuarfianni immikkut atuartitsinermi klassini atuartut qassit, meeqqat atuarfianni ingerlariaataasinnaasumik inaarutaasumik misilitsinnissamut innersuunneqartarnerannik takutitsisumik.

(Inatsisartunut ilaasortaq Nivi Olsen, Demokraatit)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut Inatsisartunut ilaasortaq Nivi Olsen, Demokraatineersoq, aalajangiussasatut siunnersuutaanut qujassuteqarfigaat.

Naalakkersuisut siunnersuuteqartoq isumaqatigaat, atuartut amerlanerpaat inaarutaasumik misilitsissimallutik atuarfik naammassisassagaat, tamatuma atuartut ataasiakkaat ilinniagaqalernissamik kissaatigisaminnik aallartitsinissaannut periarfissaqalersittarmagit.

Tunngaviusumik atuartut tamarmik pinngitsoorani misilitsinnissat naammassillugit atuarfik qimattussaavaat, misilitsinngitsoornissamulli periarfissaqarpoq. Atuarfiup pisortaata atuartup atuarfimmi inaarutaasumik misilitsinnerni peqataannnginnissaa aalajangertarpaa.

Atuartoq timimigut isumaliortaatsimigulluunniit annertuumik piginnaanikillisimasoq misilitsinnginnissamut akuerineqarsinnaavoq. Misilitsinnginnissamut aamma akuerinnittoqarsinnaavoq, atuartoq kalaallit qallunaalluunniit oqaasiinik naammaginangitsumik piginnaaneqaruni, atuartoq nunamit allamit piffissami qaninnermi tikittuusimaguni. Misilitsinnginnissamut akuerisaaneq tamatigut angajoqqaat isumasioreerlugit aalajangiunneqartartussaavoq. Misilitsinnginnissamut akuerisaasoqassappat, tamanna sioqqullugu atuartoq immikkut atugaqarluni misilitsissinnaanersoq isummerfigineqareersimassaaq.

§ 37 naapertorlugu apeqqummut 2021/40-mut akissummi ima allassimasoqarpoq: "Ilinniartitaanermut Aqutsisoqarfiup suliarinikuuaa ilitsersuut "Immikkut peqquteqartumik misilitsinneq aamma peqataanngissutaasumik", tassani anguniagaavoq malittarisassat sinaakkutillu misilitsinnissamut nassuiaaserneqarnissaat kiisalu periarfissat ersarissarnissaat, atuarfiup meeqqat atuarfiani atuartunik misilitsittussanut piareersarnermi atortakkanik, timimikkut aamma/imaluunniit pisinnaasamikkut appasittumik inissisimasunut imaluunniit assingusumik ajornartorsiutilinnut. Immikkut akuerisamik misilitsinnissamut atunerup atuartoq periarfissittarpaa inaarutaasumik misilitsinnissamut peqataaneq ikiorsiissutit atorlugit imaluunniit sinaakkutit iluanni atortunik, atuartut ataasiakkaat pisariaqartitaat aallaavigalugit - taakku atuartut immaqqa misilitsinnissaminnit peqataatinneqanngitsoorsimassagaluarput." Ilitsersuut taanna september 2020-imi saqqummersinneqarpoq.

Meeqqat atuarianni inaarutaasumik naliliineq pillugu Namminersornerullutik Oqartussat nalunaarutaanni nr. 3, 9. januar 2009-meersumi § 24 naapertorlugu atuariup pisortaata atuartut timikkut eqqarsartaatsikkulluunniit pisinnaanikinnerusut imaluunniit allamik immikkut ittumik ajornartorsiuteqartut immikkut atugaqarlutik misilitsinnissaannik neqeroorfigisussaavai, atuartut taakkua misilitsinnerup naammassinissaanut atuartullu allat naligiissumik atugaqartitaanissaat pisariaqaraangat.

Atuarfimmi atuartut qanoq amerlatigisut, pingaartumillu klassini immikkut atuartitsiviusuni atuartut, misilitsinnginnissamut akuerisaasimanersut, inaarutaasumik misilitsinnissamut nalunaarutigineqarsimanersut qassillu naammassinnersut pillugit nalunaarummi ersarissarneqartussaavoq, atuarfimmi inaarutaasumik misilitsinnerni peqataannginnissamut akuerisaasarnermut pequtaasut, kiisalu misilitsinnginnissamut akuersissutit qanoq amerlatiginersut. Pineqartup taassuma pingaarutillip siunertalimmik sammineqarnerulernissaa nalunaarutikkut aqqutissiuunneqassaaq.

Taakkua tunngavigalugit Naalakkersuisut siunnersuutigineqartup akuerineqarnissaa inassutigaaq.